

Ақийда дарслари (140-дарс). Амалнинг фойдаси бўлармикан ёки йўқми?



18:00 / 28.06.2021 2813

Мусулмон инсон бўлажак ишларда «Барчага ўзи учун халқ қилинган амал мұяссардир» жумласини шиор қилиб олиб, ўзини амалга уриши керак. Ўзи учун яхшилик амалларни қилиш мұяссар эканини исботлашга ҳаракат қилиш лозим.

Бундай яхши ишларга мұяссар бўлганда эса хурсанд бўлиши даркор. Баъзи кўнгилсиз ишлар бўлиб қолганда, уларни хато, ожизлик ҳисоблаб, дарҳол тавба қилиши, ёмон амаллар ўзи учун мұяссар әмаслигини исбот қилишга уриниши керак.

Бўлажак ишлар қаршисида мусулмон инсон ўзини қазои қадарга нисбатан қандай тутиши лозимлиги, саҳобаи киромлар ҳамда салафи солиҳлар доимо ўзларини «яхши ишга мұяссар кишилар» дея ҳисоблаб яшаганлар. Мусулмон бўлишларини катта баҳт аломати деб билишган.

Ҳаётлари давомида ўзларини доимо яхши ишга уриб яшашган.

Тақво билан бетавфиқликка бирданига дуч келсалар, яхши амалга мұяссар бўлиш ниятида ўзларини тақвога урганлар.

Сахийлик билан баҳилликка дуч келсалар, ўзларини сахийликка урганлар.

Ишchanлик ва дангасаликка дуч келсалар, ўзларини ишchanликка урганлар.

Бутун умрларини, қандай қилиб күпроқ савобли амал қилар эканман, деган фикр ва ҳаракат билан ўтказганлар.

Шунинг учун ҳам улар чарчоқ, мاشаққат, қийинчилик ва ўлимдан заррача қўрқмаганлар.

Шунинг учун ҳам барча тўсиқларни осонлик билан енгганлар.

Шунинг учун ҳам уларга доимо муваффақият ёр бўлган.

Қазои қадарга бўлган шу шаклдаги иймон заифлашганда эса ҳамма ишлар орқага кетди.

Амал қилиш ўрнига қазои қадарни тескари таъвил қилиб, «амалнинг фойдаси бўлармикан ёки йўқми», деб қуруқ сафсата сотилганда, ишлар расво бўлди. Бунинг натижасида беҳуда жанжал кўпайди. Исломий фазилатлар ўрнини иккиланиш, қўрқоқлик, дангасалик ва бошқа разолатлар олди.

Натижада салафи солиҳлар ўрнига кимлар келди?

«Бас, уларнинг ортидан бир ўринбосарлар қолдики, улар намозни зое қилиб, шаҳватларга эргашдилар. Бас, тезда ёмонликка йўлиқурлар» (Марям сураси, 59-оят).

Мусулмонлар ўз шахсиятларини, муносиб ўринларини тикламоқчи бўлсалар, қазои қадарга бўлган иймонларини аввалги соғ ҳолига келтиришлари ҳам ўта зарур ишлардан бири эканини унутмасликлари керак.

«Сунний ақийдалар» китоби асосида тайёрланди